

ACTA DA XUNTA DE GOBERNO LOCAL
Sesión extraordinaria e urxente do 7 de setembro de 2012

ASISTENTES:

Membros :

D. Abel Caballero Álvarez
D. Carlos López Font
D^a M^a Jesús Lago Rey
D^a. Raquel Díaz Vázquez
D. José Manuel Fernández Pérez
D. Angel Rivas González

NON ASISTEN:

D^a M^a Carmen Silva Rego
D. Cayetano Rodríguez Escudero
D^a. M^a Isaura Abelairas Rodríguez
D. Santos Héctor Rodríguez Díaz

Na Casa do Concello de Vigo, ás once horas e corenta e cinco minutos do día sete de setembro do ano dous mil doce e baixo a presidencia do Excmo. Sr. Alcalde, Sr. Caballero Álvarez, coa asistencia dos concelleiros/as anteriormente citados, actuando como Secretaria a concelleira, Sra. Lago Rey, constitúese a Xunta de Goberno Local desta Corporación co obxecto de realizar sesión EXTRAORDINARIA E URXENTE de acordo coa orde do día remitida a todos os membros coa antelación legal precisa.

Están tamén presentes por invitación, a titular do órgano de apoio á Xunta de Goberno Local, Sra. Campos Acuña, o interventor xeral, Sr. García Álvarez, e a titular da Asesoría Xurídica, Sra. Parajó Calvo.

A Xunta de Goberno Local adopta os seguintes acordos:

1(1044).- RATIFICACIÓN DA URXENCIA.

A Xunta de Goberno Local ratifica a urxencia da sesión.

2(1045).- PROXECTO DE CONVENIO ENTRE O CONCELLO DE VIGO E A XUNTA REITORA DO CENTRO ASOCIADO DA UNIVERSIDADE NACIONAL DE EDUCACIÓN A DISTANCIA (UNED) EN PONTEVEDRA PARA A CREACIÓN EN VIGO DUNHA AULA DE ENSINO SUPERIOR A DISTANCIA. EXPTE. 11959/332.

Examinadas as actuacións do expediente, visto o informe-proposta de data 6 de setembro de 2012, do xefe do servizo de Educación, conformado pola concelleira-delegada de área, visto o informe da Intervención Xeral municipal de data 07-09-2012, a Xunta de Goberno Local acorda:

Primeiro.- Aprobar o texto do Proxecto de Convenio entre o Concello de Vigo e a Xunta Reitora do Centro Asociado da Universidade Nacional de Educación a Distancia (UNED) en Pontevedra, para a creación en Vigo dunha Aula de Ensino Superior a Distancia, redactado polo Servizo de Educación do Concello de Vigo, que obra no expediente.

Segundo.- Aprobar o gasto anual derivado do mesmo por un importe total de 53.358,8.-€, revisable conforme ao disposto no clausulado do convenio, dos cales **17.786,26 €** corresponden ao período **setembro a decembro de 2012** coa seguinte distribución:

Cantidade	concepto	Aplicación orzamentaria
13.286,26 €	Pago profesores-titores aula UNED	3230 489 00 00
4.500,00 €	Material funxible de oficina e gastos varios para funcionamento	3230 (bolsa 48)

Terceiro.- Remitir o citado proxecto ao Presidente da Xunta Reitora citada, para a súa ratificación polo órgano competente da UNED.

PROXECTO DE CONVENIO ENTRE O PADROADO DO CENTRO ASOCIADO DA UNED EN PONTEVEDRA E O EXCMO. CONCELLO DE VIGO PARA A CREACIÓN DUNHA AULA DE ENSINO SUPERIOR A DISTANCIA

En Vigo, a..... (data)

INTERVEÑEN

Dunha parte o Excelentísimo Sr. D. Rafael Louzán Abal, Presidente da Deputación de Pontevedra, na súa calidade de Presidente da Xunta Reitora do Padroado do Centro Asociado de Pontevedra á UNED.

E doutra parte o Excmo. Sr. D. Abel Caballero Álvarez, na súa calidade de Alcalde-Presidente do Concello de Vigo

EXPOÑEN

I.- Que o Centro Asociado de Pontevedra á UNED foi creado por Orde Ministerial de data 23/02/1973 (BOE 13/03/1973), para atender o Ensino Universitario a Distancia de todas aquelas persoas residentes na súa zona de influencia.

II.- Que o Concello de Vigo está interesado en promover a creación dunha Aula do Centro Asociado de Pontevedra dentro do seu termo municipal.

III.- Que na sesión da Xunta de Goberno Local do Concello de data 24/09/2010 acordouse solicitar á Xunta Reitora do Centro Asociado a creación da devandita Aula.

IV.- Que o mencionado acordo da Xunta de Goberno Local do Concello xa é firme en vía administrativa, segundo se acredita no certificado expedido polo Secretario da Corporación

e que se achega a este convenio como Anexo Documental I.

V.- Que a Xunta Reitora do Patronato do Centro Asociado, estimando a viabilidade da devandita petición, acordou na súa reunión de 14/01/2011 solicitar á Xunta de Goberno da UNED a preceptiva autorización para a creación da citada Aula, o que se acredita mediante certificación do Secretario da Xunta Reitora unida a este Convenio como Anexo Documental II.

VI - Que a Xunta de Goberno da UNED de data 26/10/2010 autorizou a creación da devandita Aula, segundo consta no Anexo Documental III consistente en certificación do Secretario Xeral da devandita Universidade.

En mérito do anteriormente exposto ambas as dúas partes

ACORDAN

Crear unha Aula dependente do Centro Asociado á UNED de Pontevedra, na localidade de Vigo, de acordo ás seguintes

ESTIPULACIÓNS

1ª.- A Aula será parte integrante do Centro Asociado da UNED en Pontevedra, a cuxa normativa legal, administrativa e académica deberá suxeitarse no desenvolvemento das súas actividades.

2ª.- A Aula situarase nos locais pertencentes ao Bispado de Tui-Vigo (Cedidos ao Concello de Vigo por un período de 25 anos o 17 de novembro de 1997, mediante convenio subscrito entre as dúas entidades) sitos na rúa San Vicente, 3 que foron autorizados pola UNED. Este convenio rexido polo presente texto, comezará a ter efecto, unha vez conste autorización expresa do Bispado de Tui-Vigo que permita a utilización deses locais por terceiros.

Todo cambio de situación da Aula ou calquera actuación que se pretenda realizar en ou dentro do inmovible, será previamente comunicada ao Director do Centro Asociado para que, en caso de considerarse beneficiosa para as actividades da Aula, a someta á aprobación da Xunta Reitora e do Vicerrectorado de Centros Asociados, sen cuxas autorizacións non poderá realizarse. O uso dos locais pola UNED será gratuíto. Esta cesión de uso dos locais sinalados, terá inicialmente como límite a data de 31 de outubro 2022, sen prexuízo de que un novo acordo entre o Bispado de Tui-Vigo e o Concello desta cidade decida prorrogar a cesión acordada no ano 1997 e as partes asinantes deste convenio decidan –se é o caso-- a súa continuidade. A devandita cesión gratuíta de uso non poderá ser modificada nin revogada –durante o período citado-- en ningún momento, agás que ámbalas partes e conforme ao previsto na cláusula 14 do presente convenio, así o decidan.

O Concello de Vigo garantiza á UNED unha ubicación, con carácter gratuito nun/nunhos local/locais acondicionado/s para tal finalidade e que serán autorizados pola UNED.

3ª.- A Aula titorizará as ensinanzas do curso de Acceso Directo para Maiores de vinte e cinco anos (CAD) a partir da entrada en vigor do presente Convenio. Ademais das ensinanzas do CAD, o Centro Asociado poderá organizar na Aula aquelas actividades culturais non reguladas que considere convenientes para os alumnos da Bisbarra, de acordo coas directrices xerais aprobadas pola Xunta de Goberno da UNED.

4ª.- A Aula contará co número axeitado de Profesores-Titores que determine o Centro Asociado conforme ás directrices académico-docentes marcadas polos órganos colexiados da UNED, tendo o citado persoal vínculo contractual única e exclusivamente coa UNED.

5ª.- A Aula contará, convenientemente equipadas, con:

Salas para as titorías
Biblioteca / Sala de lectura
Videoconferencia
Videoteca / Audioteca
Aula informática

6ª.- A Xunta Reitora do Centro Asociado, consciente do importante servizo que se lle esixe, comprométese a cumprir coas obrigas administrativas e docentes contraídas no presente Convenio.

7ª.- Pola súa banda, o Concello de Vigo farase cargo, mediante gasto propio ou transferencia ó Centro Asociado da UNED en Pontevedra –conforme aos conceptos que se inclúen neste convenio-- da totalidade dos gastos que orixine a apertura e funcionamento normal da Aula, así como dos derivados do seu mantemento. En concreto, os seguintes:

- Asignación económica suficiente para a efectividade dos custos salariais do persoal de administración e servizos
- Asignación económica suficiente para a efectividade dos custos en concepto de profesores-titores, persoal vinculado contractualmente única e exclusivamente á UNED.
- Adquisición de material bibliográfico.
- Uso e mantemento do inmovible (auga, electricidade, limpeza do local, recollida de residuos sólidos, etc.).
- Mobiliario.
- Inmobilizado material (por exemplo, fotocopiadora, ordenadores, material de oficina, etc.).

8ª.- Co fin de facilitar a xestión académica e administrativa, poderá ser designado/a, un Coordinador/a da Aula. Corresponde á Directora do Cento Asociado a facultade de nomear ou remover o/a Coordinador/a. A proposta de designación, nomeamento e remoción deberán ter a previa conformidade da Concelleira delegada de Educación do Concello de Vigo.

9ª.- O Padroado do Centro Asociado incluírá no Orzamento anual os gastos da Aula que non sexan de aportación directa do Concello, así como a cantidade que o Concello debe achegar a esta.

10ª.- O Concello obrígase a incluír anualmente nos seus Presupostos as partidas necesarias para facer fronte aos gastos da Aula acordados neste Convenio.

11ª.- A achega económica do Concello ao Presuposto do Centro Asociado farase efectiva por semestres anticipados. O incumprimento desta cláusula será motivo de resolución do presente Convenio sen necesidade de previa denuncia.

12ª.- O Concello dotará do persoal administrativo e de servizos necesario para o normal funcionamento da Aula.

13ª. Corresponderá ó Centro Asociado á UNED en Pontevedra a selección, contratación e pagamento do profesorado-titor e a contratación do/a coordinador/a, se é o caso. Para esta finalidade, o Concello transferirá ao Centro Asociado á UNED en Pontevedra anualmente a cantidade de 39,858,80 euros correspondente á totalidade dos gastos correspondentes a este capítulo. Esta cantidade será actualizada anualmente conforme aos incrementos de IPC que se produzan. As eventuais modificacións no número de profesores-titores iniciais, serán propostas polo Centro Asociado á UNED en Pontevedra ao Concello de Vigo. De ser aprobada polo órgano competente do Concello de Vigo esta modificación, farase a modificación equivalente na contía da transferencia. O Concello transferirá á ó Centro Asociado á UNED en Pontevedra, así mesmo, a cantidade necesaria para os gastos de material funxible de oficina, así como para outros gastos varios para o seu normal funcionamento, por un importe anual de 13.500 euros, así mesmo modificable anualmente en función do incremento do IPC, ou por acordo expreso entre as partes.

14º.- Este Convenio, agás acordo anticipado polas partes, terá vixencia ata o 31 de outubro de 2022. Por acordo expreso das partes, poderá prorrogarse máis alá desta data, ou modificarse durante o seu período de vixencia para adaptarse a novas circunstancias, trala tramitación administrativa que corresponda.

A denuncia do Convenio poderá ser realizada por calquera das partes, debendo ser notificada expresa e fidedignamente cun prazo mínimo de doce meses de antelación. Consecuentemente, efectuada a denuncia, ambas as dúas partes seguirán obrigadas a cumprir todos e cada un dos seus compromisos ata a expiración do devandito prazo.

15º.- Xustificación da achega municipal:

Conta xustificativa final

Dentro do primeiro trimestre de cada ano, deberá presentarse por parte do Centro Asociado á UNED en Pontevedra UNED a conta xustificativa final na que deberá constar a declaración das actividades realizadas e dos gastos incorridos e o importe, procedencia e aplicación dos fondos propios e outros recursos que, se é o caso, financiaran tamén a Aula da UNED en Vigo.

A documentación da conta xustificativa final deberá incluír unha relación de todos os xustificantes de pagamento dos gastos incorridos coas remisións pertinentes aos xustificantes de pagamento.

Documentación xustificativa

As facturas, que serán orixinais, deberán recoller o número de CIF, a data, número de factura e o IVE, estes xustificantes quedarán a disposición do Concello de Vigo. Non se admitirán facturas fotocopiadas ou compulsadas, nin aquelas que non reúnan as esixencias previstas no RD 1.496/2003, de 28 de novembro polo que se regulan as obrigas de facturación. Nestas facturas se computará o gasto acreditado deducindo o IVE, salvo que se xustifique a exención do dito imposto.

Se a beneficiaria solicitara a devolución do orixinal presentado, a área xestora da subvención procederá ao estampillado da factura orixinal, indicando no estampillado o motivo da subvención e se o importe do xustificante impútase total ou parcialmente á subvención recibida; indicándose neste caso o importe exacto que resulte afectado pola subvención. A copia do xustificante orixinal estampillado se incorporará ao expediente e a área xestora da subvención procederá á devolución do orixinal.

Serán gastos elixibles os que de xeito indubidable respondan á natureza das actividades financiadas e se realicen no prazo comprendido entre o 1 de xaneiro e o 31 de decembro de cada ano de vixencia do Convenio.

Cando o gasto singularizado exceda dos 18.000 euros no caso de subministros ou servizos, a UNED deberá solicitar tres ofertas, salvo que non exista mercado para as ditas contratacións, cuestión esta que deberá ser motivada.

16ª.- Comisión de seguemento

Coa sinatura do convenio constituirase unha comisión de seguimento que realizará o control e seguimento da súa execución e xestión económica. A comisión estará formada por dous/dúas representantes nomeados polo Centro Asociado á UNED en Pontevedra, o Xefe do Servizo municipal de Educación, un/ha Técnico/a adscrito/a ao citado Servizo e un/unha técnico/a da Administración xeral da Asesoría Xurídica do Concello de Vigo. Esta Comisión estará presidida pola Concelleira delegada de Educación do Concello de Vigo coa vicepresidencia da Directora do Centro asociado da UNED en Pontevedra.

17ª.- En tanto non se denuncie o Convenio, toda desconformidade na partida presupostaria de gastos da Aula que consta no presente convenio supoñerá a prórroga automática do último orzamento aprobado.

18ª.- Forma parte inseparable deste Convenio o anexo Documental consistente en:

I.- Certificación expedida polo Secretario do Concello acreditando que o acordo da Xunta Local de Goberno, solicitando ao Centro Asociado a creación da Aula na localidade, é firme en vía administrativa.

II.- Certificación expedida polo Secretario da Xunta Reitora do Padroado acordando solicitar á Xunta de Goberno da UNED autorización para crear dito Aula.

III.- Certificación expedida polo Secretario Xeral de UNED autorizando a creación da citada Aula.

IV.- Certificación expedida polo Interventor xeral do Concello acreditando a existencia de partida presupostaria para os gastos da Aula para a anualidade 2012.

19ª.- As partes asinantes do Concello de Vigo acordan expresamente someter calquera reclamación en sede xurisdiccional perante os Xulgados e Tribunais da cidade de Vigo, recoñecendo a mesma como competente ao efecto.

Con base nos antecedentes expresados e suxeición ás estipulacións pactadas, queda establecido o presente CONVENIO DE CREACIÓN DUNHA AULA NO CONCELLO DE VIGO DEPENDENTE DO CENTRO ASOCIADO DE PONTEVEDRA Á UNED o cal é asinado por cuadruplicado, en proba de conformidade, por ambas as dúas partes no lugar e data arriba indicados."

E sen ter máis asuntos que tratar, o Sr. presidente rematou a sesión ás once horas e cincuenta minutos. Como secretaria dou fe.

rs.

A CONCELLEIRA-SECRETARIA
DA XUNTA DE GOBERNO LOCAL,

Mª Jesús Lago Rey.